

# SOSIEDĖS

JONUŠATĖ LAIMA (KURŠIENĀ)

Tik saulē ispinda, tojau Pranienē so Kazienē i kēima ont soulalē.  
– Gērdiejē, Pranien', Jozienēs doktie bus mokīklas dērektorē!  
– No, bet nomēi nieka nedērb. Ni karvelēs, ni kiaulelēs... Vēsor apžielē! Truobuo stotkā vēsomet neplautē...

– O Butkū Ontē seniūnu tapa!

– Nier i kou paveizietē! Pupu pīeds, ožē barzda! Tik lēižovis!

– Nu jo! So lēižoviu marēs išplak, so nagās sobēnēs neatsēkasa! Valu Pranelis aple anou i laikrašti parašē. Īr ē nuotrauka – tēik parēitus, tiek pastatius!

– Ale tas Valu Pranelis toks čiupelē, atruoda, kad lig pēnkiū nesoskaita. O matā, da i laikrašti paraša! Tik so paišeliu anam ē dērbtē!

– Ē anuo pati – čēpnuotēs nabaštēks! Praded pēitus vērtē – gala nier! Ē kuoki tēn kūli verd!

– Jog ēr anuos baba vērtē nemokiejē! Rusa laikās liōb pardavinietē tokes posiau nupēstas mielēnas vēstas so vēsom galvom. Vēina karta ana parsēnēšē tou vēsta ē ož karta i katēlāti – galva ēšsēkēšosi... Ondou atvērē, vēsta katietē pradiejē!

– Liōb sakītē, kad ana matuzoliaus nabaštēks! Ējē karvē mēlžtē

i katēlāti. Nebrada nē vēina čīsta viedra! O Pranelē doktie mokslus baigē!

– Matiau! Apsēdarius kap nežmogus! Basom kojiem, isispīrus i sportbatius! Soplišusiom kelniem! Pasēlēnkē – marškiniū netor... Aš pri karvē tēp nētu! Pati nusēmaliavuojus, o motina negal sējjuona išpruosavotē! Atējē i bažnītē kap iš karvēs sobēnē!

– Matiau anou bažnītiuo. Sosieds Petris nosēpērka mašinēlē ē atvēžē!

– Kap nesēnē, tēp ē neēlgā! Krovēns pējoks! Iki pērmōjē stolpa!

– Sūnos Stasioks žanējas so Leliu Rima, rēk mašinas...

– Ale ta Rima varēnējuos, varēnējuos Stasioka kap vēsta vabala ē prilēpa kap šūds pri kaliošē! Ot, slinka patē gaus! Vēsē tēn gol iki pēitu! Daržalis tokē dēdoma, kad šova, pakielēs kojē, apmižtu! Ē Rimas motina vīžēnuo vēžama. Omžēna sopoliu karalienē! Bet vēsas lēgas išsēlakstē, kumet sožēnuojē, jog mona kiaulē padviesē!

– Kad ēr tas Stasioks gers smertiou siūstē! No, bet motina pati kriaučka, pasiūs Rimā jopelē!

– Kuoki tēn kriaučka! Siūdēnaus... Pērma kodrēs sosēkērpa, nogarā medžegas pritrūka!

– Šīas laikās ne dīvā ē be nogaras, ē be priekē! Girdiejau, Pranien', kad ē tava Dalē žanējas so kažkokiu iš Afrikas...

– Koks tava rēkals! So savi rūpinkēs! Ot žmuonēs pavidelnikā! Tik, matā, kētē rūp, savēs nemata!

# PVM

VAŠKĪS ALGIMANTS (KRETINGA)

Akcizos Kloika išēje i torgo pērtkē sūrē. Išeinont anuo žmuona dā sušoka:

– Veizieik, ka būtom so pēvēēmu ne brongiau kap pēnkē eurā.

Torgou Akcizos nusiveiziejē anam patēkusī sūri ē pasiteirava pardaviejēs, kēik uns kainou.

– Trīs eurā.

– A uns ī so PVM?

– Ne, uns ī so razinkuom.

– Vo a so PVM netorēt?

– Tojau paveiziesio, – torgininkē pardieliuojē vēsa kopēta sūriu, kuožna ruodīdama:

– Tas šētā ī so kminās, tēi untā so krapās, kap unt zlastēs neborio so PVM, nu pat rīta meta vēsus ēšpērka. Vo kēik tamstelē doutumi už tuoki sūri?

– Pēnkis eurus.

Ta motrēškelē net tūpteliejē:

– Ponalī, atēk rītu, aš dēl tavēs pasistuoruosio.

Akcizos padiekavuojē ē pažadiejē kēta dēina viel užeitē. Anam nuējos, šalēp stuoviejosi ē kiaušinius targavuojosi muotrēška pasicēkavējē:

– Dēkuo tam puonou neitēkā?

– Nein anū besuprastē. Ēiška sūrē so kažkuokio PVM, muokietom pēnkis eurus... A to kartās nežēnā kas tas ī?

– Aš konkretē neso anuo matiosi, bet kēik gērdiejau, tas ī dēdēlē gers dalīks.

– Iš kuo to sprēndi?

– I laikraštius raša ē par televizurio ruoda, ka vēsē, kas tik sugeb, anou gruobsta.

– Vēskas aiško, – atsidoso ta, kor so sūrēs stuoviejē, – musintās dēl tuo mums ē neblēikt. Vo kāp nuoriētiuo nuors vēina kēta suspaustē, ka tuokius pinigus už anus siūla.

– Vo to sakīk, ka anēi ī so PVM. Idiesi daugiau prišmuožu, droskas, čēsna ē nieks duorā nesupras.

Kēta dēina Akcizos apsērga, tad i torgo išēje anuo žmuona. Uns anā nupasakuojē, kor stuovies ta pardaviejē so sūrēs. Ta žmuona nesunkē anou sosērada ē, somokiejosi pēnkis eurus, gava sūri so PVM. Atsiskaitiosi ana jau ruošies soktē link nomū, ka anou soduomēna kētamē prekīstalē galē sodietē tokēi pat sūrē, ē ana atsėvuožējē paklaustē:

– Vo pu kēik tēi šētā?

– Pu trīs, nes anēi be PVM.

– Nuorēt pasakītē, ka vos ne posē sūrē kainas sodara PVM? – zlastēs pajiemē Akciza žmuona.

– No tēp. Dedo negailiedama, neskundo ni kēik.

– Matuos, – sobumbiejē pērkiejē, ronkuos pavartiosi sūri, ē dēdēlē nekontēna nuēje.

– Nebein soprastē, kuo tēi žmuonēs benuor, – pu nuosē borboliava pardaviejē, – saka, ka mata, kas mon vēsā nesuprontama, ē vēstēik nervuojēs.

\*\*\*

Aukštaitē žmuona porta mėigtonti žemaiti vīra:

– Pabusk pagaliau.

– No, prabodau, kuo nuori?

– Kelkis.

– No va, prasided. Tēp ē mėslėjau...